




三水縣志卷之十二

列女

在昔劉向列傳班姬七誡嗣而范蔚宗女史凡閨
中奇烈悉爲備載皎然與日月爭光焉嗟大丈夫
之能立節者以其嘗學問知名義也然且不數見
況巾幗者流其閒生逢不偶而卒能慷慨赴死從
容就義非貞烈天植能辨此乎太史遷曰夫婦之
際人道之大倫也守道以全倫人生之大行也微
而必彰舊者存之遺者補之新者錄之洵足以廣
勵風俗矣志列女

登記號 65520

37年 1月2日

913.733
1012
6

列女

譚氏胥江人黃道夫之妻嘉靖三十三年西山賊流刼氏奔匿不及爲賊所掠渡江至中流給賊渴甚乞寬縛就飲賊信之遂併所襁子投水而死

梁氏龍池人梁廷翰女適高明縣山川生員黎輔輔早喪孀守事姑孝謹賊掠鄉奮身救姑賊憐其色欲污之大罵曰死賊吾夫秀才也孰敢辱我乎遂被害具見高明志

以上死節者

陳氏西村人西南梁允淇聘妻未歸淇商外十餘載厄命於賊淇父母未知也爲之遙娶以待陳歸事

舅姑甚孝逾年冬月得報洪于石門遇害氏聞變
慟哭絕而復甦服斬衰三年一日陳父母欲奪其
志潛已許他人矣懼不可奪乃走一婢詭言母病
危甚偕肩輿促歸蓋欲昇達所許者家也氏揣知
其情卽垢容敝服不肯登輿與婢徒步奔至母前
計遂沮居常有語及再醮者卽掩耳大哭語者却
走洪家不育童僕閭以內凡井臼縫爨之役氏悉
任之姑性嚴重待之或少恩氏處以愉婉惟益敬
謹而已無忤言慍色蓋三十餘年如一日也萬歷
壬子鄰族里排及通學上其事於縣知縣閱上其

事於憲司縣旌扁曰節婦貞女學道扁曰冰操無

雙兩司扁曰閨貞瞻以月糧後四載卒年五十六

淇弟汰囑當街屋四閒爲祠橫涌田三畝附四房

蒸嘗族人同祀之

按遙娶之說事屬創聞但未見夫面因而勵節則依然處子之

貞故可傳也由今所聞天湖李綏寧孫媳方氏者西樵文襄公孫女也未嫁奔喪先謁宗廟翁姑次開衾續晤夫之面旋加緇纒俾夫若成人者嗣是槁容閉戶不通問詢誓守盟以盡焉其志其識更爲可嘉但以方在苦貞未便稱表而有不容默默者亦存其事于有待也因附記此舊志

陸氏白坭人陳適中之妻年二十三生一女而夫卒

自誓守節事舅姑以孝處妯娌以和鄉族稱之無

間言卒年八十有二

陳氏西南民何葉盛妻葉盛經商道卒陳年十九無
子家用不敷紡績爲活篝燈敝帷肅如也鄉人高
其節請諸有司爲建不二天坊以表之年七十終
知縣朱端明遣吏致祭營塋鹿峒涌口表石見存
蔡氏獨樹岡人適西南街梁鉞年二十六孀守無子
性素峻潔終日默坐或累月不踰閭值家多難翁
及二叔連喪氏竭蹙料理撫諸幼姪如己子擇繼
允洪享壽八十有三

何氏南海大欖村人三江增生陳傑妻二十五孀守
無男子止存二女諸兄弟以年少家貧勸令改適

氏從一爲誓日勤紡績加以敬謹族里欲待其年
逾五十乃舉旌表甫四十八卒

以上皆無子而守節者

陳氏西南人年十九歸李時逢踰年時逢卒遺腹兩
月生子享遠服闋姑舅憐其少欲嫁之氏不從矢
志不二勤於紡績謹事舅姑年六十四知縣朱旌
其門曰冰清玉潔

鄧氏九水江人陸體剛妻歸半載而剛卒年十九遺
腹六月舉男鄧矢志不二事舅姑備極孝謹鄉閭
感化壽七十八卒

杜氏周村人龍池梁維爵妻歸僅朞月而爵亡杜年

二十二遺腹生男杜飲泣撫孤獨處一室凡婚姻
宴會皆不與焉兄杜喬掄早喪當訣使人語之曰
守節是矣不亦難乎氏矢志不奪姑病禱以身代
其教遺腹子鞭策不爲姑息子名效孟少補弟子
員族嘗以孟母目之故云

梁氏高要將仕郎梁碧峰女西南街李孟陽妻也陽
業儒不就好咏吟假經商遊歷西甌北流閒有泗
城土官聞其名邀之甲戌季冬陽付書官窰蘇崑
崙歸悉旅情後卒于泗土官禮葬之氏年二十七
乙亥春遺腹舉男卽秋聞訃焦枯愴怛幾絕復甦

者數兼之堂有垂白家無擔儲俯仰無聊或有以
難守狀告者氏輒指死爲誓身任操作篝燈紡績
十指爲劬命男小名曰泗哥志勿忘父終處也每
以讀書成人爲孝訓泗故泗長而名曰克孝從母
志也少婦遺孩勉子成名并大受報於若孫及卒
香山李文恭大宗伯爲之銘墓謂有婦德而又有
婦才蓋稔之者素矣

劉氏橫村人適龍池梁儲吉吉亡時氏年二十七僅
二女遺腹乃產一男家甚貧無瓶儲粟執婦工爲
食以鞠遺齡事姑曲盡其道不以貧委年五十九

卒

區氏利瓊人洗文潤妻嫁未暮而夫以遊學客亡遺腹子逢熙區矢志孀居家貧紡績事姑孝敬未齒不衰後熙用吏階謁選授主簿卒于途遺二孫氏哀號撫卹見年七十三歲崇正九年知縣沈帛米

致問扁旌其間通詳司道佇俟旌表

以土皆守節而撫遺腹者

羅氏高要羅岸村人性澹素適白垵陳九韶九韶名家子亦英特不羣補開建廩生羅以父喪愆期年二十有二歸之事舅姑以孝事夫以禮九韶早喪羅年二十九撫孤峻栢居喪哀慟鄰里感嘆寡居

數載有以改志訪者卽以死自誓訪者不敢言自
後服素茹蔬凡諸閭內宴飲皆不與貞靜自守以
此終身邑令朱秋林爲之立傳

黃氏清塘鄧介甫妻年十八孀守食貧育孤紡績自
給治家有閨範親族咸德之壽九十七終

李氏金竹人陸敏學妻年十八適敏學二十生子可
潔甫十日而夫亡家貧父母欲奪其志李日抱其
子泣曰此陸氏一家命脉也棄姑事二姓吾何忍
每一語及輒悲號不食父母懼乃止苦節六十年
如一日得病諸孫環侍李曰而輩勿戚俟而翁忌

日歸接我乃行耳至日沐浴而逝正其夫死之年
月日也鄉人以爲節感所致

郭氏清塘陸仲南妻南卒氏年二十孀居誓不改節
奉姑以禮教子有方言動悉關家教年九十五知
縣閔旌其門曰節壽並崇

鄧氏九水江人陸萬載之妻萬載亡氏年二十二或
憫其少諭令改適氏毀容立志閉戶不出孝事舅
姑人無閒言撫孤便旣成人爲娶婦陳氏亦旦夕
事鄧甚勤及鄧卒陳哀慟太過遂與同逝聞者傷
之

陳氏白坭人龍池梁維智妻年二十六孀守一子廷翰方二歲矢志撫育教以成立閨儀端肅有孫國相婦爲驪坑陸氏亦二十八孀守食貧廢飾紡績育孤婦節前後並著云

郭氏新村人龍池庠生梁仁妻二十六而孀服闋舅憐其志使姑諭之曰汝少婦能爲吾兒孀居乎吾兒昔從諸生中有大志汝他日不媿地下人矣氏哽咽共姜自許育孤成立惟服女工絕去容飾壽七十五

鄧氏鄧坑人龍池梁道華妻華貧糊口於外客死高

涼子名世亦週歲鄧年二十有四訃至一哭而絕
水漿不入口者數日或勸曰兩伯仲可依耳千里
於他日香煙誰託乎與其從死曷若撫孤鄧因勉
飣粥顧四壁蕭然內外俱苦而紡績給膳自如也
卒年八十

鄧氏金竹民陸道甫妻十九適道甫生子希禹希孟
年二十二夫亡哀傷自殞者數四夫家貧父母欲
爲改適乃自剪髮以示不二撫育二子紡績以供
羹粥猶善於訓誨後希禹以歲薦起家希孟亦以
吏材致用

陳氏三江生員范顏諫妻歸范兩載范遽殞繼而翁
姑淪亡力殯三喪叔伯罔靠矢志無他撫子鶴卜
長遊鬻序娶婦衛氏未幾一載孫甫孕腹卜已告
終范祚存亡賴氏扶植衛氏賦性順懿能嗣其志
相率靖節遠近嘖嘖嘆稱經生儒排里等簽舉本
學呈縣給扁旌異藩司汪詳按院行學扁獎雙節
貞操以維倫紀云

陳氏龍池梁定餘妻歸門恪奉巾櫛僅星週而定餘
卒守志堅貞茹苦力貧撫遺男毓成立壽八十四
歲卒

蘇氏三江范東山妻其先出自名族婦範風著范旣
往益堅貞勵勉課子吳成名出仕爲邑宰有聲氏
從之任祿養年已八十每諄諄訓子遂爲良吏士
民祝頌有序

鍾氏高要練濬鄉福州同知鍾大咸之第三孫女幼

稟貞淑素嫻禮文于歸白坭邑庠陳萬穎爲妻事

姑相夫孝敬勤儉康熙十二年甲寅三月十二夫

被賊傷氏朝夕枕棺泣血斷葷歠粥淡薄自甘數

十年如一日也治家嚴肅訓誡二子長子興讓進

邑庠鄉族鄰里咸頌賢德

麥氏董藁麥啓謙之女許配白坭浩叔爲妻未及歸
門浩叔染病風顛欲聽另適氏矢志不從仍歸配
合生子產宰浩叔卒氏孀守撫子孝敬翁姑庭無
間言年六十而卒

龐氏貢生龐大壯之女許配何殿升未及歸門康熙
五年夫故奔喪守節歷今二十餘載貞操有如一
日紳士里保公報詳奉具 題優獎

鄧氏清塘陸挺異妻異卒氏年二十孀居誓不改節
儉積置產立嗣茹苦四十餘年六十五而卒合都
紳士父老聯呈前府李前縣房旌其門曰栢節流